

**PROKLAMASIE NO. R. 4 VAN 2020**  
**van die**  
**PRESIDENT van die REPUBLIEK van SUID-AFRIKA**

**WET OP SPESIALE ONDERSOEKEENHEDE EN SPESIALE TRIBUNALE, 1996**  
**(WET NO. 74 VAN 1996): VERWYSING VAN AANGELEENTHEDE NA**  
**BESTAANDE SPESIALE ONDERSOEKEENHEID**

AANGESIEN bewerings soos beoog in artikel 2(2) van die Wet op Spesiale Ondersoekeenhede en Spesiale Tribunale, 1996 (Wet No. 74 van 1996) (hierna na verwys as die "Wet"), gemaak is in verband met die aangeleentheid van die Nasionale Tesourie;

EN AANGESIEN die Nasionale Tesourie of die Staat verliese gely het wat verhaal kan word;

EN AANGESIEN ek dit nodig ag dat gemelde bewerings ondersoek en siviele geskille voortspruitend uit sodanige ondersoek bereg moet word;

DERHALWE verwys ek hierby, kragtens artikel 2(1) van die Wet, die aangeleentheid in die Bylae vermeld, ten opsigte van die Nasionale Tesourie, vir ondersoek na die Spesiale Ondersoekeenheid ingestel by Proklamasie No. R. 118 van 31 Julie 2001 en bepaal dat, vir die doeleindes van die ondersoek van die aangeleentheid, die opdrag van die Spesiale Ondersoekeenheid is om soos beoog in gemelde Wet, ondersoek te doen na enige beweerde—

- (a) ernstige wanadministrasie in verband met die aangeleentheid van die Nasionale Tesourie;
- (b) onbehoorlike of onregmatige optrede deur die werknemers of beamptes van

die Nasionale Tesourie;

- (c) onregmatige bewilliging of besteding van publieke geld of eiendom;
- (d) onwettige, onreëlmatige of nie-goedgekeurde verkrygende handeling, transaksie, maatreël of praktyk wat op Staatseiendom betrekking het;
- (e) opsetlike of nalatige verlies van publieke geld of skade aan publieke eiendom;
- (f) misdryf bedoel in Dele 1 tot 4, of artikel 17, 20 of 21 (vir sover dit op voornoemde misdrywe betrekking het) van Hoofstuk 2 van die Wet op die Voorkoming en Bestryding van Korrupte Bedrywighede, 2004 (Wet No. 12 van 2004), en welke misdrywe gepleeg is in verband met die sake van die Nasionale Tesourie; of
- (g) onwettige of onbehoorlike optrede deur enige persoon wat ernstige benadeling vir die belange van die publiek of enige kategorie daarvan veroorsaak het of kan veroorsaak,

wat plaasgevind het tussen 1 Januarie 2016 en die datum van publikasie van hierdie Proklamasie of wat plaasgevind het voor 1 Januarie 2016 of na die datum van publikasie van hierdie Proklamasie, wat relevant is tot, verband hou met, insidenteel of bykomstig is tot, die aangeleenthede vermeld in die Bylae of wat dieselfde persone, entiteite of kontrakte betrek wat ondersoek word kragtens die volmag verleen deur hierdie Proklamasie, en om al die werksaamhede en bevoegdhede wat deur die Wet aan die gemelde Spesiale Ondersoekeenheid toegewys of opgedra is, uit te oefen of te verrig in verband met die genoemde aangeleenthede in die Bylae, insluitend die verhaal van enige verliese wat deur die Nasionale Tesourie of die Staat gely is.

Gegee onder my Hand en die Seël van die Republiek van Suid-Afrika te Waterkloof op hede die 6 dag van Januarie Twee duisend-en-twintig.

**CM Ramaphosa**

**President**

Op las van die President-in-Kabinet:

**R Lamola**

**Minister van die Kabinet**

**BYLAE**

1. Die aanskaffing van, of kontraktering vir die Geïntegreerde Finansiële Bestuurstelsel deur of namens die Nasionale Tesourie, en betalings wat in verband daarmee gemaak is op 'n wyse wat—

- (a) nie regverdig, mededingend, deursigtig, billik, of koste-effektief was nie;
- (b) strydig was met toepaslike—
  - (i) wetgewing;
  - (ii) handleidings, riglyne, praktyknotas, omsendskrywes of instruksies wat deur die Nasionale Tesourie uitgevaardig is; of
  - (iii) handleidings, beleid, prosedures, voorskrifte, instruksies of praktyke van, of wat op die Nasionale Tesourie van toepassing is; of
- (c) gefasiliteer was deur die onwettige, onreëlmatige of onbehoorlike inmenging deur werknemers of beamptes van die Nasionale Tesourie, en enige verwante ongemagtigde, onreëlmatige of vrugtelose en verspilde uitgawes wat deur die Nasionale Tesourie of die Staat aangegaan is as gevolg daarvan.

2. Enige onwettige of onreëlmatige optrede deur werknemers of beamptes van die Nasionale Tesourie, die betrokke diensverskaffer, dié se werknemers of enige ander persoon of entiteit ten opsigte van die bewerings soos uiteengesit in paragraaf 1 van hierdie Bylae.